



საჯარო სამართლის იურიდიული პირი -
ბათუმის შოთა რუსთაველის სახელმწიფო უნივერსიტეტის
აკადემიური საბჭო

და დ გ ე ნ ი ლ ე ბ ა №06-01/70

ქ. ბათუმი

14 სექტემბერი, 2020 წ.

„ბსუ-ს სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის №111 დადგენილებაში ცვლილებების და დამატებების შეტანის თაობაზე

„უმაღლესი განათლების შესახებ“ საქართველოს კანონის 21-ე მუხლის 1-ლი პუნქტის, ბსუ-ს წესდების მე-8 და 66-ე მუხლების, „ახალი კორონავირუსით გამოწვეულ ინფექციასთან (COVID -19) დაკავშირებული ზოგადი რეკომენდაციების აღსრულებისათვის დამატებით გასატარებელი ღონისძიებების შესახებ“ ბსუ-ს რექტორის 2020 წლის 1 სექტემბრის N01-02/109 ბრძანების, „2020-2021 სასწავლო წელს საქართველოს ტერიტორიაზე მოქმედი უმაღლესი საგანმანათლებლო დაწესებულებების მიერ სასწავლო პროცესის განხორციელების შესახებ“ საქართველოს განათლების, მეცნიერების, კულტურისა და სპორტის მინისტრის 2020 წლის 04 სექტემბრის N778305 ბრძანების, „ბსუ-ს სტატუსშეჩერებული სტუდენტების 2020-2021 სასწავლო წლის შემოდგომის სემესტრიდან სასწავლო პროცესში დაბრუნების საგამონაკლისო წესის შესახებ“ ბსუ-ს აკადემიური საბჭოს 2020 წლის 14 სექტემბრის N06-01/69 დადგენილების საფუძველზე, აკადემიურმა საბჭომ

და ა დ გ ი ნ ა:

1. „ბსუ-ს სასწავლო პროცესის მარეგულირებელი წესის დამტკიცების შესახებ“ ბსუ-ს აკადემიური საბჭოს 2015 წლის 8 ოქტომბრის №111 დადგენილებაში შევიდეს ცვლილებები და დამატებები, კერძოდ, დადგენილებით დამტკიცებული წესის (დანართი 1-ის):

ა) პირველი მუხლის პირველი, მე-2 და მე-3 პუნქტები ჩამოყალიბდეს შემდეგი რედაქციით:

„1. წინამდებარე წესი არეგულირებს საჯარო სამართლის იურიდიული პირი - ბათუმის შოთა რუსთაველის სახელმწიფო უნივერსიტეტის (შემდეგში „ბსუ“ ან „უნივერსიტეტი“) საბაკალავრო/დაწყებითი განათლების მასწავლებლის მომზადების ინტეგრირებულ საბაკალავრო-სამაგისტრო/მედიცინის მიმართულებით აკადემიური

უმადლესი საგანმანათლებლო პროგრამების, ასევე ქართულ ენაში მომზადების საგანმანათლებლო პროგრამისა და მასწავლებლის მომზადების საგანმანათლებლო პროგრამის სასწავლო პროცესს (ბსუ-ს სტუდენტის სტატუსის მოპოვება, შეჩერება, შეწყვეტა; ერთიანი ეროვნული გამოცდების გარეშე ჩარიცხვა; საერთაშორისო მობილობა; სტუდენტის უფლება-მოვალეობები; მობილობა/შიდა მობილობა; სტუდენტის მიერ პროგრამის მოთხოვნების შესრულება, სწავლის შედეგის მიღწევა; სტუდენტის შეფასება და გასაჩივრების პროცედურა; კვალიფიკაციის მინიჭება).

2. სასწავლო პროცესის ელექტრონულად წარმართვის, ასევე სასწავლო პრაქტიკის, როგორც სასწავლო კომპონენტის, შესრულების რეგულაცია შესაძლებელია განისაზღვროს ბსუ-ს აკადემიური საბჭოს სხვა დადგენილებით ან/და ბსუ-ს რექტორის ბრძანებით.

3. ბსუ-ს სადოქტორო საგანმანათლებლო პროგრამების სასწავლო კომპონენტის შესრულება რეგულირდება წინამდებარე წესით, გარდა იმ გამონაკლისებისა, რასაც უშუალოდ ადგენს ბსუ-ს აკადემიური საბჭოს მიერ დამტკიცებული „ბსუ-ს დოქტორანტურის დებულება“.

ბ) მე-3 მუხლის მე-2 პუნქტი ჩამოყალიბდეს შემდეგი რედაქციით:

„2. ამ მუხლის პირველი პუნქტის „ბ“ -„დ“ ქვეპუნქტებით გათვალისწინებული რომელიმე საფუძველით უნივერსიტეტის სტუდენტის სტატუსის შეჩერების მოთხოვნით სტუდენტმა განცხადებით უნდა მიმართოს რექტორს შესაბამისი სემესტრის სასწავლო პროცესის დაწყებიდან არა უგვიანეს 15 დღისა. სტუდენტის ხანგრძლივი და მძიმე ავადმყოფობის ან სხვა შემთხვევაში (ფორსმაჟორული გარემოება, პანდემია, ტექნიკური ან/და სხვა ობიექტური გარემოება), როცა სტუდენტის სასწავლო პროცესში მონაწილეობის შეუძლებლობა დასტურდება (სტუდენტის განცხადებით, ცნობით ან სხვა დოკუმენტით), გამონაკლისი შესაძლოა დაიშვას დეკანის წარდგინების საფუძველზე მომზადებული რექტორის ბრძანებით. სტუდენტს, მისი განცხადების (მიზეზის მითითების გარეშე) საფუძველზე, ბსუ-ს სტუდენტის სტატუსი შეიძლება შეუჩერდეს არანაკლებ 1 წლის ვადით (სტატუსის შეჩერების შესაბამისი სემესტრის - გაზაფხულის ან შემოდგომის - დაწყებამდე), იმის გათვალისწინებით, რომ სტატუსის შეჩერებიდან 5 წლის გასვლის შემდეგ, პირს უწყდება სტუდენტის სტატუსი. დამატებითი სემესტრის/წლის ბსუ-ს სტუდენტი ვერ სარგებლობს პირადი განცხადების საფუძველზე სტუდენტის სტატუსის შეჩერების უფლებით.“;

გ) მე-3 მუხლის მე-2 პუნქტის შემდეგ დაემატოს 2¹, 2², 2³ 2⁴ და 2⁵ პუნქტები, რომლებიც ჩამოყალიბდეს შემდეგი რედაქციით:

„ 2¹. პირადი განცხადების საფუძველზე სტატუსშეჩერებული (ე.წ. „აკადემიური შვებულებაში“ მყოფი ან ჯანმრთელობის მდგომარეობის გამო ან უცხოეთში სწავლის გამო სტატუსშეჩერებული) ბსუ-ს სტუდენტის სასწავლო პროცესში დაბრუნების (სტუდენტის სტატუსის გააქტიურების/სტუდენტის სტატუსის შეჩერების შესახებ რექტორის ბრძანების ძალადაკარგულად ცნობის) შესახებ ბსუ-ს რექტორის ბრძანება გამოიცემა ამ სტუდენტის მიერ, შესაბამისი სემესტრის (გაზაფხულის ან შემოდგომის, რომელშიც შეუჩერდა) დაწყებიდან არაუგვიანეს 15 დღისა მის წარმოდგენილი განცხადების საფუძველზე. სტუდენტის დასაბუთებული განცხადებისა და დეკანის დასაბუთებული წარდგინების საფუძველზე შესაძლებელია ბსუ-ს რექტორის ბრძანება გამოიცეს შესაბამისი სასწავლო წლის/სემესტრის დაწყებიდან არაუგვიანეს 21-ე დღისა.“

2². სტატუსშეჩერებული ბსუ-ს სტუდენტის (გარდა ადმინისტრაციული/ფინანსური დავალიანების ან აკადემიური რეგისტრაციის გაუვლელი გამო სტატუსშეჩერებულისა) სასწავლო პროცესში შიდა მობილობის გავლის გარეშე დაბრუნება დასაშვებია შესაბამისი სემესტრიდან (გაზაფხულის ან შემოდგომის), რომელშიც პირს შეუჩერდა ბსუ-ს სტუდენტის სტატუსი.

2³. ადმინისტრაციული (ფინანსური დავალიანების) ან აკადემიური რეგისტრაციის გაუვლელი გამო სტატუსშეჩერებული სტუდენტი, ასევე სხვა საფუძვლით სტატუსშეჩერებული პირი, რომელსაც სურვილი აქვს სასწავლო პროცესში დაბრუნდეს განსხვავებულ სემესტრში (და არა იმ სემესტრში, რომელშიც შეუჩერდა სტატუსი), ვალდებულია ბსუ-ს სასწავლო პროცესში დაბრუნების მიზნით მონაწილეობა მიიღოს ბსუ-ს შიდა მობილობაში.

2⁴. სტატუსშეჩერებული ბსუ-ს სტუდენტის შიდა მობილობის გარეშე სასწავლო პროცესში დაბრუნების შემთხვევაში შესაბამისი ფაკულტეტის კრედიტების აღიარების კომისიამ უნდა უზრუნველყოს ამ სტუდენტის მიერ სასწავლო პროცესში დაბრუნებამდე გავლილი სასწავლო კურსების მიმდინარე საგანმანათლებლო პროგრამასთან თავსებადობის (კრედიტების აღიარების) დასკვნის შედგენა და სტუდენტისათვის სწავლის სემესტრის განსაზღვრა (ასეთი საჭიროების შემთხვევაში).

2⁵. ბსუ-ს სასწავლო პროცესში დაბრუნების ან სტუდენტის სტატუსის შეჩერების წინამდებარე მუხლით დადგენილი წესისაგან გამონაკლისი შესაძლოა დაიშვას სტუდენტის ინტერესების გათვალისწინებით, საქართველოს კანონმდებლობის შესაბამისად გამოცემული ბსუ-ს აკადემიური საბჭოს დასაბუთებული დადგენილებით ან/და ბსუ-ს რექტორის დასაბუთებული ბრძანებით.“;

დ) მე-5 მუხლის შემდეგ დაემატოს 5¹ და 5² მუხლები და ჩამოყალიბდეს შემდეგი რედაქციით:

„ მუხლი 5¹. საერთაშორისო მობილობაში მონაწილეობა

1. ბსუ-ს სტუდენტი უფლებამოსილია მონაწილეობა მიიღოს ბსუ-სა და უცხო ქვეყნის საგანმანათლებლო დაწესებულებასთან დადებული ხელშეკრულების საფუძველზე შემუშავებულ გაცვლით საგანმანათლებლო პროგრამაში (შემდეგში „საერთაშორისო მობილობა“), ბსუ-ს აკადემიური საბჭოს მიერ დამტკიცებული „საერთაშორისო გაცვლითი პროგრამების ადმინისტრირების წესისა“ და ბსუ-ს რექტორის შესაბამისი ბრძანების მოთხოვნათა დაცვით.

2. ბსუ-ს გაცვლითი საგანმანათლებლო პროგრამის (პროექტის) მონაწილე ბსუ-ს სტუდენტის საერთაშორისო მობილობის სემესტრის დასაწყისში შესაბამისი ფაკულტეტის დეკანის სამსახურებრივი ბარათის საფუძველზე გამოიცემა ბსუ-ს რექტორის ბრძანება სტუდენტის უცხო ქვეყანაში/უნივერსიტეტში გარკვეული ვადით სასწავლებლად გამგზავრების თაობაზე.

3. სტუდენტი ვალდებულია წარუდგინოს ბსუ-ს შესაბამისი ფაკულტეტის ხარისხის უზრუნველყოფის სამსახურის უფროსს ბსუ-ს და მიმღები უნივერსიტეტის უფლებამოსილი პირების მიერ ხელმოწერილი სტუდენტის სასწავლო ხელშეკრულების (ე.წ. „learning agreement“) ასლი.

4. სტუდენტის სასწავლო ხელშეკრულების (ე.წ. „learning agreement“) ასლს შესაბამისი ფაკულტეტის ხარისხის უზრუნველყოფის სამსახურის უფროსი (ფაკულტეტის დეკანის ვიზირებით), ელექტრონული საქმისწარმოების საშუალებით წარუდგენს ბსუ-ს რექტორს და ადმინისტრაციის ხელმძღვანელს (შემდეგში ეგზავნება სტრატეგიული განვითარებისა და საგარეო ურთიერთობათა დეპარტამენტს და საფინანსო-ეკონომიკური დეპარტამენტს).

5. საერთაშორისო მობილობაში მონაწილეობის პერიოდში ბსუ-ს სტუდენტს არ უჩერდება სტუდენტის სტატუსი. ამ პერიოდში სტუდენტისათვის აკადემიური რეგისტრაცია გულისხმობს სასწავლო კურსებზე დარეგისტრირებას, უცხო ქვეყნის პარტნიორ უმაღლეს საგანმანათლებლო დაწესებულებაში, ამ ქვეყანაში და უმაღლეს საგანმანათლებლო დაწესებულებაში დადგენილი წესით. მობილობის პერიოდში სტუდენტი სწავლას აგრძელებს ამ ქვეყნის კანონმდებლობით დადგენილი წესითა და უცხო ქვეყნის უმაღლეს საგანმანათლებლო დაწესებულების ბსუ-სთან გაფორმებული ხელშეკრულებით (მემორანდუმით) განსაზღვრული პირობებით.

6. საერთაშორისო მობილობიდან დაბრუნების შემდეგ ბსუ-ს სტუდენტმა და ბსუ-ს შესაბამისმა სტრუქტურულმა ერთეულმა (მათ შორის შესაბამისი ფაკულტეტის დასაქმებულმა) უნდა შეასრულონ ბსუ-ს აკადემიური საბჭოს დადგენილებებით დამტკიცებული წინამდებარე წესით, „საერთაშორისო გაცვლითი პროგრამების ადმინისტრირების წესით“ (2019 წლის N06-01/89 დადგენილება) და „უცხოეთში ათვისებული კრედიტების აღიარების წესით“ (2017 წლის N55 დადგენილება) გათვალისწინებული პროცედურა, რათა გამოიცეს სტუდენტის საერთაშორისო მობილობიდან ბსუ-ს სასწავლო პროცესში დაბრუნების შესახებ ბსუ-ს რექტორის ბრძანება.

7. მობილობის პერიოდის აკადემიური რეგისტრაციის (სავალდებულო და არჩევითი სასწავლო კურსების რეგისტრაციის) შედეგები ბსუ-ს სასწავლო პროცესის მართვის სისტემაში აისახება სტუდენტის ბსუ-ს სასწავლო პროცესში დაბრუნების შემდეგ, სტუდენტის მიერ საერთაშორისო მობილობის პერიოდში ათვისებული სასწავლო კურსების (კრედიტების) აღიარებისა და ბსუ-ში სწავლის სემესტრის განსაზღვრის შესახებ ბსუ-ს რექტორის ბრძანების საფუძველზე.

მუხლი 5¹. ერთიანი ეროვნული/სამაგისტრო გამოცდის ჩაბარების გარეშე ბსუ-ში ჩარიცხვა და სასწავლო პროცესი

1. ერთიანი ეროვნული გამოცდების/საერთო სამაგისტრო გამოცდების გავლის გარეშე ბსუ-ში ჩარიცხვის უფლებას აბიტურიენტები/მაგისტრანტობის კანდიდატი/სტუდენტები მოიპოვებენ საქართველოს განათლებისა და მეცნიერების მინისტრის 2011 წლის 29 დეკემბრის N224/ნ ბრძანების, „ბსუ-ში ერთიანი ეროვნული გამოცდების/საერთო სამაგისტრო გამოცდების გავლის გარეშე სწავლის უფლების მქონე აბიტურიენტების/მაგისტრანტობის კანდიდატების/სტუდენტების ჩარიცხვის წესის დამტკიცების შესახებ“ ბსუ-ს აკადემიური საბჭოს 2018 წლის 1 მარტის N34 დადგენილების, „ერთიანი ეროვნული გამოცდების ჩაბარების გარეშე ბსუ-ს საგანმანათლებლო პროგრამაზე ჩარიცხვის მსურველ პირებთან გასაუბრების ჩასატარებლად გასატარებელი ღონისძიებების შესახებ“ ბსუ-ს რექტორის 2018 წლის 12 ივლისის N01-08/85 ბრძანებისა და წინამდებარე წესით გათვალისწინებული პროცედურების დაცვით.

2. საქართველოს განათლების, მეცნიერების, კულტურისა სპორტის სამინისტროს (შემდეგში „სამინისტრო“) ბრძანების შესაბამისად ერთიანი ეროვნული გამოცდების/საერთო სამაგისტრო გამოცდების გავლის გარეშე ბსუ-ში ჩარიცხვის უფლებამოპოვებული პირი უფლებამოსილია სამინისტროს ბრძანების გამოცემიდან 1 წლის განმავლობაში ჩარიცხოს და დაიწყოს სწავლა ბსუ-ში ისე, რომ შესაძლებელი იყოს სწავლის შედეგების მიღწევა (როგორც წესი, ბრძანება უნდა გამოიცეს შესაბამისი სასწავლო წლის (სემესტრის) დაწყებამდე. უფლებამოპოვებული პირის დასაბუთებული განცხადებისა და ფაკულტეტის დეკანის დასაბუთებული სამსახურებრივი ბარათის საფუძველზე შესაძლებელია ამ პირთან გაფორმდეს ხელშეკრულება და ბსუ-ში ჩარიცხვის

შესახებ ბსუ-ს რექტორის აქტი გამოიცეს სასწავლო წლის (სემესტრის) დაწყებიდან არაუგვიანეს მე-7 კვირისა (შუალედური გამოცდის კვირის დაწყებამდე).

3. ბსუ-ში ჩარიცხვის უფლებამოსილებული პირი ვალდებულია სამინისტროს ბრძანების გაცნობის შემდეგ შესაბამისი ფაკულტეტის დეკანის ოფისიდან მიღებული ინფორმაციის/კონსულტაციის (აკადემიური კალენდარის, აკადემიური და ადმინისტრაციული რეგისტრაციის, სასწავლო კურსების და სხვა) საფუძველზე წარმოადგინოს დასაბუთებული განცხადება ბსუ-ში ჩარიცხვის შესახებ, რომელშიც უნდა მიუთითოს კონკრეტული სასწავლო წელი (სემესტრი), საიდანაც შეძლებს სასწავლო პროცესში ჩართვას.

4. შესაბამისი ფაკულტეტის დეკანის ოფისი უფლებამოსილია გააფორმოს ხელშეკრულება ბსუ-ში ჩარიცხვის უფლებამოსილებულ პირთან მას შემდეგ, რაც წარმოდგენილი იქნება:

ა) უფლებამოსილებული პირის განცხადება ჩარიცხვის სასწავლო წლის (სემესტრის) მითითებით, მისი ბსუ-ში ჩარიცხვის უფლების მოპოვების შესახებ სამინისტროს ბრძანების გამოცემის შემდეგ;

ბ) პირადი საქმის გახსნისათვის საჭირო დოკუმენტაცია (პირადობის მოწმობა/პასპორტი, სწავლის საფასურის გადახდის ქვითარი, განათლების დამადასტურებელი დოკუმენტების კანონმდებლობის შესაბამისად დამოწმებული ასლები და სხვა, ბსუ-ს საქმისწარმოების ინსტრუქციით ან/და კანონმდებლობით გათვალისწინებული დოკუმენტაცია);

გ) „ბსუ-ს სწავლის საფასურის გადახდის წესის“ შესაბამისად ამ პირის სწავლის საფასურის გადახდის შესახებ საფინანსო-ეკონომიკური დეპარტამენტიდან დადასტურებული ინფორმაცია.

5. ერთიანი ეროვნული/სამაგისტრო გამოცდის ჩაბარების გარეშე ბსუ-ში ჩარიცხვის შესახებ ბსუ-ს რექტორის ბრძანება გამოიცემა ბსუ-ში ჩარიცხვის უფლებამოსილებულ პირთან, წინამდებარე მუხლის მოთხოვნათა დაცვით, ხელშეკრულების გაფორმების შესახებ შესაბამისი ფაკულტეტის სამსახურებრივი ბარათის საფუძველზე.

6. ერთიანი ეროვნული გამოცდის ჩაბარების გარეშე ბსუ-ს უცხოენოვან საგანმანათლებლო პროგრამაზე ჩარიცხვის შესახებ ბსუ-ს რექტორის ბრძანება გამოიცემა და სასწავლო პროცესი (აკადემიური და ადმინისტრაციული რეგისტრაცია, სტუდენტის სტატუსის შეჩერება/შეწყვეტა და სხვა) წარიმართება საქართველოს შესაბამისი კანონმდებლობით, წინამდებარე წესით, დაინტერესებულ პირთა ბსუ-ში ჩარიცხვის მიზნით მოზიდვის თაობაზე გაფორმებული შესაბამისი მემორანდუმის პირობების, სწავლის საფასურის გადახდის წესისა და სტუდენტთან გაფორმებული ხელშეკრულების შესაბამისად.“;

ე) მე-8 მუხლის მე-2 პუნქტი ჩამოყალიბდეს შემდეგი რედაქციით:

„2. სასწავლო წელი ორსემესტრიანია. თითოეული სემესტრი მოიცავს 19 კვირას, საიდანაც:

ა) 15 კვირა ეთმობა სტუდენტთან საკონტაქტო სამუშაოს (სალექციო/ჯგუფში მუშაობა/ პრაქტიკული ან/და ლაბორატორიული მეცადინეობა, საბაკალავრო/სამაგისტრო ნაშრომზე მუშაობა), მათ შორის ერთი კვირა - შუალედურ გამოცდებს;

ბ) 3 კვირა – ძირითად საგამოცდო სესიას;

გ) 1 კვირა – დამატებით საგამოცდო სესიას.

ვ) მე-9 მუხლის მე-7 და მე-8 პუნქტები ჩამოყალიბდეს შემდეგი რედაქციით:

„ 7. საგანმანათლებლო პროგრამის მოთხოვნების შესრულების მიზნით ბსუ-ს სტუდენტი სასწავლო წლის/სემესტრის დასკვნითი საგამოცდო სესიის დასრულების შემდეგ გაივლის მომდევნო სასწავლო წლის/სემესტრის წინასწარ აკადემიურ რეგისტრაციას, რაც გულისხმობს სასწავლო პროცესის მართვის ელექტრონულ სისტემაში სტუდენტისათვის ძირითადი საგანმანათლებლო პროგრამით გათვალისწინებული სავალდებულო და არჩევითი სასწავლო კურსების გავლაზე ვალდებულების აღებას. სტუდენტი უფლებამოსილია სტუდენტური პორტალის მეშვეობით წარმოდგენილი დასაბუთებული განცხადებით მხოლოდ ერთხელ, შესაბამისი სემესტრის დაწყებამდე 2 კვირის ვადაში, მოითხოვოს აკადემიური რეგისტრაციის მონაცემებში ცვლილებების შეტანა.

8.. ბსუ-ს სტუდენტი (გარდა რეგულირებადი საგანმანათლებლო პროგრამის სტუდენტისა) უფლებამოსილია აირჩიოს დამატებითი საგანმანათლებლო პროგრამა (არანაკლებ 30 და არაუმეტეს 60 კრედიტის მოცულობით) და სასწავლო წლის განმავლობაში ასათვისებელი კრედიტების ზღვრული ოდენობის (75 კრედიტი) გათვალისწინებით, სასწავლო პროცესის ელექტრონულ სისტემაში დაარეგისტრიროს შესაბამისი სასწავლო კურსები (გაიაროს აკადემიური რეგისტრაცია), არაუგვიანეს სწავლების მე-4 სემესტრისა, ძირითადი საგამოცდო სესიის დასრულებისთანავე. სტუდენტის მიერ არჩეული დამატებითი პროგრამის შეცვლა ან რეგისტრაციის გაუქმება (შესაბამისად, მის ნაცვლად არჩევითი სასწავლო კურსების რეგისტრაცია) დასაშვებია სასწავლო სემესტრის დაწყებამდე არაუგვიანეს 2 კვირის ვადაში.“;

ზ) მე-9 მუხლის მე-8 პუნქტის შემდეგ დაემატოს 8¹ პუნქტი და ჩამოყალიბდეს შემდეგი რედაქციით:

„ 8¹. ბსუ-ს სტუდენტი, სასწავლო სემესტრის დაწყებამდე არაუგვიანეს 2 კვირისა, სასწავლო წლის განმავლობაში ასათვისებელი კრედიტების ზღვრული ოდენობის გათვალისწინებით, **უფლებამოსილია:**

- ა) არჩევითი სასწავლო კურსი/მოდული, რომელიც აირჩია და გაიარა წინა სემესტრში, მაგრამ ჩაიჭრა, შეცვალოს სხვა არჩევითი სასწავლო კურსით/მოდულით (იმავე კრედიტით);
- ბ) შეფასების გაუმჯობესების მიზნით ხელახლა დაარეგისტრიროს და ისწავლოს იგივე სასწავლო კურსი, ასეთ შემთხვევაში სტუდენტს საბოლოო შეფასებად უფიქსირდება უკეთესი შედეგი.“;

თ) მე-14 მუხლის მე-3 და მე-4 პუნქტები ჩამოყალიბდეს შემდეგი რედაქციით:

„ 3. სამაგისტრო/საბაკალავრო ნაშრომის შესრულებისათვის ბსუ-ს სტუდენტს ენიშნება ხელმძღვანელი. საბაკალავრო/სამაგისტრო ნაშრომის (თემის) დასახელების შერჩევა ხდება სტუდენტისა და ხელმძღვანელის მოსაზრებათა შეჯერების საფუძველზე, სტუდენტის ინტერესებისა და თანამედროვე პრობლემატიკის გათვალისწინებით. საბაკალავრო/სამაგისტრო ნაშრომის (თემის) დასახელებას და ხელმძღვანელს, ფაკულტეტის შესაბამისი დარგობრივი დეპარტამენტის წარდგინებით, ამტკიცებს ფაკულტეტის საბჭო:

- ა) საბაკალავრო ნაშრომის შემთხვევაში - მისი შესრულების სემესტრის დაწყებიდან არაუგვიანეს 2 კვირის ვადაში (აკადემიური რეგისტრაცია);

ბ) სამაგისტრო ნაშრომის შემთხვევაში - მაგისტრანტის სწავლების არაუგვიანეს მე-3 სემესტრის დასაწყისისა.

4. ბსუ-ს სტუდენტის საბაკალავრო/სამაგისტრო ნაშრომის ხელმძღვანელი შეიძლება იყოს:

ა) საბაკალავრო ნაშრომის შემთხვევაში - ბსუ-ს აკადემიური ან სამეცნიერო თანამდებობის პირი, ასევე მოწვეული სპეციალისტი ან მასწავლებელთა პერსონალის წარმომადგენელი (არანაკლებ მაგისტრის ან მაგისტრის ხარისხთან გათანაბრებული ხარისხის მქონე პირი);

ბ) სამაგისტრო ნაშრომის შემთხვევაში - ბსუ-ს პროფესორი/ასოცირებული პროფესორი/ასისტენტი-პროფესორი/დოქტორის ხარისხის მქონე ასისტენტი/მთავარი ან უფროსი მეცნიერ-თანამშრომელი/უფროსი მასწავლებელი/ბსუ-ს ემერიტუსი. ფაკულტეტის დეკანის დასაბუთებული წინადადების საფუძველზე, შესაძლებელია სამაგისტრო ნაშრომის ხელმძღვანელი იყოს ბსუ-ს დოქტორანტი (ბსუ-ს მოწვეული მასწავლებელი), რომელსაც შესრულებული აქვს შესაბამისი სადოქტორო პროგრამის სასწავლო კომპონენტი.“;

ო) მე-15 მუხლის მე-3 და მე-4 პუნქტები ამოღებული იქნეს;

კ) მე-16 მუხლის მე-2-4 პუნქტები ამოღებული იქნეს;

ლ) მე-16 მუხლის მე-19-20 პუნქტები ჩამოყალიბდეს შემდეგი რედაქციით:

„ 19. თუ სამაგისტრო ნაშრომი შეფასდა ამ მუხლის მე-11 პუნქტის „ვ“ ქვეპუნქტით გათვალისწინებული შეფასებით - არადამაკმაყოფილებელი (insufficient) ან მაგისტრანტი არ გამოცხადდა საჯარო დაცვაზე, მას უფლება აქვს სამაგისტრო ნაშრომი წარადგინოს განმეორებით საჯარო დაცვაზე, დამატებითი საგამოცდო სესიის პერიოდში.

20. თუ სამაგისტრო ნაშრომი დამატებით გამოცდაზე კვლავ შეფასდა ამ მუხლის მე-11 პუნქტის „ვ“ ქვეპუნქტით გათვალისწინებული შეფასებით - არადამაკმაყოფილებელი (insufficient), მაგისტრანტი უფლებამოსილია გადამუშავებული სამაგისტრო ნაშრომი წარადგინოს მომდევნო სემესტრში, ხოლო ამ მუხლის მე-11 პუნქტის „ზ“ ქვეპუნქტით გათვალისწინებული შეფასების - სრულიად არადამაკმაყოფილებელი (sub omni canone) მიღების შემთხვევაში, მაგისტრანტი კარგავს იგივე სამაგისტრო ნაშრომის წარდგენის უფლებას.“.

2. დადგენილება გამოქვეყნდეს ბსუ-ს ვებგვერდზე.

3. დადგენილება გასაცნობად და აღსასრულებლად დაეგზავნოს ბსუ-ს მართვის ორგანოებს, რექტორის მოადგილეებს, ფაკულტეტებს, საფინანსო-ეკონომიკურ დეპარტამენტს, სასწავლო პროცესის დეპარტამენტს, სტუდენტთა კარიერული განვითარების, კულტურისა და სპორტის დეპარტამენტს, იურიდიულ დეპარტამენტს და საინფორმაციო ტექნოლოგიების სამსახურს.

4. დადგენილება ძალაშია გამოცემისთანავე.

5. დადგენილება შეიძლება გასაჩივრდეს მისი ვებგვერდზე გამოქვეყნებიდან ერთი თვის ვადაში ბათუმის საქალაქო სასამართლოში (ქ. ბათუმი, სტეფანე ზუბალაშვილის №30).

აკადემიური საბჭოს თავმჯდომარე,
რექტორი, ასოცირებული პროფესორი

მერაბ ხალვაში